

Abadiyāh

Rab Adom kī Adālat Karegā

¹ Zail meñ wuh royā qalamband hai jo Abadiyāh ne dekhī. Us meñ wuh kuchh bayān kiyā gayā hai jo Rab Qādir-e-mutlaq ne Adom ke bāre meñ farmāyā.

Ham ne Rab kī taraf se paighām sunā hai, ek qāsīd ko aqwām ke pās bhejā gayā hai jo unheñ hukm de, “Uṭho! Āo, ham Adom se laṛne ke lie taiyār ho jāeñ.”

² Rab Adom se farmātā hai, “Maiñ tujhe qaumoñ meñ chhoṭā banā dūngā, aur tujhe bahut haqīr jānā jāegā.

³ Tere dīl ke ghurūr ne tujhe fareb diyā hai. Chūnki tū chaṭṭānoñ kī darāroñ meñ aur bulandiyōñ par rahtā hai is lie tū dīl meñ sochtā hai, ‘Kaun mujhe yahāñ se utār degā?’”

⁴ Lekin Rab farmātā hai, “Khāh tū apnā ghoñslā uqāb kī tarah bulandī par kyoñ na banāe balki use sitāroñ ke darmiyān lagā le, to bhī maiñ tujhe wahāñ se utār kar khāk meñ milā dūngā.

⁵ Agar ḍākū rāt ke waqt tujhe lūṭ lete to wuh sirf utnā hī chhīn lete jitnā uṭhā kar le jā sakte haiñ. Agar tū angūr kā bāgh hotā aur mazdūr fasal chunane ke lie āte to thoṛā-bahut un ke pīchhe rah jātā. Lekin terā anjām is se kahīñ zyādā burā hogā.

6 Dushman Esau * ke kone kone kā khoj lagā lagā kar us ke tamām poshīdā k̄hazāne lūṭ legā.

7 Tere tamām ittahādī tujhe mulk kī sarhad tak bhagā deṅge, tere dost tujhe fareb de kar tujh par ghālib āeṅge. Balki terī roṭī khāne wāle hī tere lie phandā lagāeṅge, aur tujhe patā nahīn chalegā.”

8 Rab farmātā hai, “Us din main Adom ke dānishmandoṅ ko tabāh kar dūngā. Tab Esau ke pahārī ilāqe meṅ samajh aur aql kā nām-onishān nahīn rahegā.

9 Ai Temān, tere sūrme bhī saḡht dahshat khāeṅge, kyoṅki us waqt Esau ke pahārī ilāqe meṅ qatl-o-ghārat ām hogī, koī nahīn bachegā.

10 Tū ne apne bhāī Yāqūb † par zulm-o-tashaddud kiyā, is lie terī k̄hūb ruswāī ho jāegī, tujhe yoṅ miṭyā jāegā ki āindā terā nām-onishān tak nahīn rahegā.

11 Jab ajnabī faujī Yarūshalam ke darwāzoṅ meṅ ghus āe to tū fāsile par kharā ho kar un jaisā thā. Jab unhoṅ ne tamām māl-o-daulat chhīn liyā, jab unhoṅ ne qurā dāl kar āpas meṅ Yarūshalam ko bānt liyā to tū ne un kā hī rawaiyā apnā liyā.

12 Tujhe tere bhāī kī badqismatī par k̄hushī nahīn manānī chāhie thī. Munāsib nahīn thā ki tū Yahūdāh ke bāshindoṅ kī tabāhī par shādiyānā bajātā. Un kī musibat dekh kar tujhe shekhī nahīn mārṅī chāhie thī.

13 Yih thīk nahīn thā ki tū us din tabāhshudā shahr meṅ ghus āyā tāki Yarūshalam kī musibat

* 1:6 Esau se murād Adom hai. † 1:10 Yāqūb se murād Isrāīl hai.

se lutf uṭhāe aur un kā bachā-khuchā māl lūṭ le.

¹⁴ Kitnī burī bāt thī ki tū shahr se nikalne wāle rāston par tāk meñ baiṭh gayā tāki wahān se bhāgne wālon ko tabāh kare aur bache huon ko dushman ke hawāle kare.

¹⁵ Kyoñki Rab kā dīn tamām aqwām ke lie qarīb ā gayā hai. Jo sulūk tū ne dūston ke sāth kiyā wuhī sulūk tere sāth kiyā jāegā. Terā ghalat kām tere apne hī sar par āegā.

Allāh kī Qaum Najāt Pāegī

¹⁶ Pahle tumheñ mere muqaddas pahār par mere ghazab kā pyālā pīnā paṛā, lekin ab tamām dīgar aqwām use pītī raheñgī. Balki wuh use pī pī kar khalī kareñgī, unheñ us ke ākhirī qatre bhī chāṭne pareñge. Phir un kā nām-o-nishān nahīn rahegā, aisā lagegā ki wuh kabhī thīn nahīn.

¹⁷ Lekin Koh-e-Siyyūn par najāt hogī, Yarūshalam muqaddas hogā.

Tab Yāqūb kā gharānā † dubārā apnī maurūsi zamīn par qabzā karegā,

¹⁸ aur Isrāīlī qaum § bharaktī āg ban kar Adom ko bhūse kī tarah bhasm karegī. Adom kā ek shaḥs bhī nahīn bachegā. Kyoñki Rab ne yih farmāyā hai.

¹⁹ Tab Najab yānī junūb ke bāshinde Adom ke pahārī ilāqe par qabzā kareñge, aur maḡhrib ke nashebī pahārī ilāqe ke bāshinde Filistiyon kā ilāqā apnā leñge. Wuh Ifrāīm aur Sāmariya ke

† 1:17 Yāqūb kā gharānā se murād Isrāīl hai.
tarjumā: Yāqūb aur Yūsuf ke gharāne.

§ 1:18 Lafzi

ilāqon̄ par bhī qabzā kareᅅge. Jiliyād kā ilāqā Binyamīn ke qabīle kī milkiyat banegā.

²⁰ Isrāīl ke jilāwatanon̄ ko Kanāniyon̄ kā mulk shimālī shahr Sārpāt tak hāsīl hogā jabki Yarūshalam ke jo bāshinde jilāwatan ho kar sifārād meᅅ jā base wuh junūbī ilāqe Najab par qabzā kareᅅge.

²¹ Najāt dene wāle Koh-e-Siyyūn par ā kar Adom ke pahārī ilāqe par hukūmat kareᅅge. Tab Rab hī Bādshāh hogā!”

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30